

西園聞見錄

西園聞見錄卷之二十七目錄

外編

宰相中

往行

胡文穆公廣

楊文敏公榮

楊文貞公士奇

黃文簡公准

楊文定公溥

高文義公穀

彭文憲公時

商文毅公輅

李文達公賢

呂文懿公原

岳文肅公正

劉文和公翊

尹文和公道

徐文靖公溥

劉文靖公健

丘文莊公濬

李文正公東陽

謝文正公遷

王文恪公縉

楊文忠公廷和

劉文肅公忠

梁文康公儲

西園聞見錄卷之二十七 外編

嶺南 張 萱子孟奇甫 輯

晉陵 陸自嶽層霄甫訂梓

宰相中

往行

胡文穆公廣建文二年廷試第一更名靖靖難後召入內閣在上前承顧問必據理對而以忠厚爲本未嘗及人過奉旨制勅視草卽有所見必具可否以聞多見采納所撰進文字上知出公筆輒稱善所奏對語及所裁機務退未嘗出口雖於親厚亦然禮部郎中周訥建請封禪羣臣亦多言此太平盛事上不聽時獨公之言與上意合既退作卻封禪頌奏之

楊文敏公榮初名子榮太宗皇帝入正大統始建內閣簡翰林之臣七人專典密務七人者解縉胡廣黃淮胡儼金幼孜公及士奇也惟公齒最少最警敏上爲更名榮一日晚上御右順門召內閣諸臣獨公一人

在出江西三司所奏言吉安鄉民嘯聚者已復業蓋朝廷初有聞卽遣行人許子謨齎勅撫諭子謨行又遣都督韓觀率兵繼之如不下卽加兵及是奏至上諭公曰觀不至不下其降勅褒觀公讀奏訖對曰計發奏之日觀尙在中道未足褒從之自是益重公永樂十八年扈從北征侍上坐帳殿上曰東宮監國久政務閑熟今歸天下事於東宮朕將老焉公曰太子孝友天下歸心稱皇上付託上大悅北征還將西征親藩有奏建文中江西所聚集民兵可徵用出奏示公公對曰陛下命復民業將二十年矣今復徵非信上曰朕意固如此遂寢尙書夏原吉以兵饟不給坐繫呂震言其姦侍講李時勉嘗論事亦有言其賣直者皆激上怒公悉委曲爲之辨解浙江三司奏處州之麗水福建之政和山寇劫掠請勅出兩都司合兵討之公言愚民爲有司所苦出不得已兵出卽良民先被害願遣一勅使撫諭之不足煩兵上從之卒如公言無事永樂二十二年上又北征至榆木川大漸時太子在京公祕不發喪斂畢馳告太子太子至卽位是爲仁宗已而上知公軍中倉卒有大功明

年仁宗崩太子又去南京防奸豫變兩京戒嚴公急迎太子入卽位是爲宣宗宣德三年秋上東巡駕出喜峰塞召公問曰人君馭世之權孰重對曰命德討罪上曰然二者天下公器舜舉十六相誅四凶而天下服以天下之好惡爲好惡也齊威王烹阿封卽墨大夫不以左右之好惡爲好惡也人君賞罰至公無私然後能服天下公頓首稱善時楊公士奇退朝閉門謝客公頗通請謁上召責之曰卿何不恤外議公頓首曰臣日侍彤庭與天顏相接他人欲見而無隙若不啓門以納天下之士兵民休戚孰得而知上悅故上每朝會罷有機務計議必親御翰墨坐公姓名識御寶或用御押封出付公規畫公感知遇益竭誠體國勤職事盛寒暑及小疾未嘗少怠於武事尤諳練將士勇怯饋運難易邊鄙利害道里迂直無不周知故凡承顧問與計算皆能適事宜無不豫中嘉謀忠畫造膝而言所以裨益於上惠利於下者蓋多矣時侍講王璉每與公語退謂人曰公志在朝廷不少間於燕私之時眞可謂社稷臣也

楊文貞公士奇舊名寓以字行由薦舉初授審理副成祖初以編修入內閣永樂六年上巡狩北京詔天下命公視草上稱善又命與諸尚書觀之兵部尚書劉雋私語公曰請以有字易自字公善之衆謂二義不相遠且上既稱善不必易公奏曰國家大體當用雋言駕狩北京皇太子監國上命蹇義金忠黃淮與公輔導九年上還南京一日召公問曰爾輔東宮久其所行何如公以孝敬對上使言其實對曰凡有事宗廟祭物祭器皆親閱去年將時享頭風作醫言當汗殿下曰汗卽不敢蒞祭左右請遣代斥之曰上以命我我又遣人代乎遂親祭祭畢汗遍體勿藥病自愈每進御用物皆躬閱封識遣行不輕信下人駕北征殿下不敢寧居恆日中昃始食駕還而後卽安上曰此子道當然公曰古聖賢亦皆盡其當然者耳殿下天資高有過未嘗不知知之未嘗不改將來必不負陛下付託上大悅仁宗旣卽位改元禮部尚書呂震言於上曰今喪服已踰二十七日請如太祖敕漢制易吉服上未答震退徧請羣臣明日釋服公謂震曰今未可比此例蓋洪武中有遺詔且仁孝皇

后崩太宗皇帝衰服後仍服素衣冠經帶者數月今可遽卽吉乎震厲聲曰朝廷事爾每執異尙書蹇義兼取二說明旦朝臣皆素衣冠黑角帶遂以聞上亦未答明日上素冠麻衣經出視朝文臣惟諸學士武臣進英國公如上所服罷朝上諭左右曰呂震昨奏當易服武聽臣下易之梓宮在殯吾豈忍易士奇所執是也宣德初公上歷代名臣奏議是年陞華蓋殿大學士公入謝頓首言北京山東賦棘歲八十萬爲香炭得無與寬詔戾上立減十五萬上初卽位聞高煦有異志欲發其事疑未決獨召公問曰昨問蹇義漢府事對曰不知上曰若朕未有知爾輩慮有離間不敢言今朕旣知矣爾言之何害公對曰臣與義事東宮外人無敢與臣言者但漢王始封國雲南不肯行改青州又不行今知將徙都北京惟欲留守南京天下皆疑其心惟陛下善處之使早有定所全父子之恩幸甚上默然起還宮後數日悉得其反狀及所爲戰具大怒褫其冠帶繫之西華門內東宮力拯解乃免遂命削其兩護衛徙樂安州曰此去北京甚邇卽其作禍可朝發而夕擒也時天下方面大臣

及羣有司皆朝京師兵部尚書李慶言於上曰民間畜馬蕃衍已散之軍伍尙餘數千請令朝覲官領之少甦民力太僕苑馬寺歲課其息有罰與民同公謂慶不可慶忿不納公獨奏曰朝廷求賢任官今乃使養馬而課責與民同豈貴賢賤畜之意乎明日復奏曰必行此令天下賢者誰復肯仕上許出內批罷之已而不聞明日公又言之上曰偶忘之吾當卽批出不爽也午刻上御思善門召公諭曰內批豈眞忘之朕聞李慶呂震輩皆忿卿朕念卿孤立恐爲衆所傷不欲因卿言而罷今有名矣出示一章乃陝西按察使陳智言畜馬不便命公據此草勅止之公頓首言陛下知臣臣不孤矣上復謂公曰繼今令有不便惟密與我言李慶輩不識大體不足語也大理少卿戈謙數言事過激尙書呂震吳中都御史劉觀侍郎吳廷用等交奏其賣直沽名上頗厭之公進曰謙雖昧於大體蓋亦感恩圖報爾古人有言主聖則臣直惟陛下容之上猶不憚因免謙朝而使視事如故公又進言曰陛下有詔求言今謙因言取咎朝臣皆以言爲戒且四方朝覲之臣咸在豈能盡知謙過



若傳之於遠人將謂朝廷不能容直言上惕然曰朕非惡言事謙言自有過者卿可以朕心諭衆人公曰此非臣所當論當以璽書開喻可也上遂命公書勅引過而待謙如初令百官毋以謙爲戒上嘗論科舉之弊公曰科舉當兼取南北士上曰北人學問不逮南人公曰長才大器多出北方豈但南人可用也上曰然則將何如公曰試卷例緘其姓名請於外書南北二字如當取百人則南六十北四十南北人才皆入彀矣上曰卿言良是命與禮部計議以聞議定未上而宮車宴駕宣宗卽位遂行之宣德七年高煦反車駕親征罪人旣得師還尙書陳山來迎見上請乘勢移師彰德襲執趙王則朝廷永無憂矣上疑之以問楊榮榮力贊其決又語蹇義夏原吉二人依違其間榮遂傳旨令公草勅詰趙王公曰事當有實天地鬼神豈可欺哉今當以何爲辭榮曰今逆黨言實與趙謀卽是矣何患無辭公曰太宗皇帝惟三子今上惟二叔其有罪者不可恕無罪者當加厚庶幾仰慰皇祖之靈榮意未解曰汝不草勅則吾當以聞時惟楊公溥與公意合溥曰吾二人俱請入見明其

大義榮先趨入公二人繼之門者不納俄復召蹇夏二公蹇夏以公言入告上不懌而止駕還京師意大悟不復論彰德事矣然言者喋喋上皆不聽特召公曰論趙王者曰益多當如何公對曰今日宗室惟趙王於陛下最親當念保全之豈可惑羣言上曰吾思所以保全之道欲封羣言示之俾自處公曰更得一璽書諭之幸甚遂遣廣平侯袁容都御史劉觀持勅往諭且示以衆言趙王喜曰吾生矣卽獻護衛上表謝恩而言者頓息上待趙王日益親而陳山竟疎斥之旣久召公問曰吾待趙叔不失親親之禮爾有力焉黎利遣人進前安南陳王嫡孫嵩表乞立爲陳氏後辭甚懇切上亦厭兵欲從之大臣有言此黎利之請當益發兵誅之與之無名徒示弱於天下上召公與謀之楊公榮曰永樂中費數萬人命得此至今勞者未息困者未甦因其請而與之便公曰榮言當從力求立陳氏後者太宗皇帝之心求之未得乃郡縣其地十數年兵民困於交趾極矣此皆祖宗之赤子體祖宗之初心正陛下盛德何謂無名漢棄珠厓前史以爲美談何謂示弱臣侍仁宗皇帝久聖心

每憾此事願陛下勿疑上意遂決時修王朝史事皆公總裁是非悉徵諸實每語同列曰天下萬世之事當以天下萬世之心處之如有一毫私意不論厚薄皆當獲罪神明侍講學士王達講乾九四舉儲貳以說皇太子疑其言問公對曰此宋儒胡瑗之說太子曰與常人言亦舉此說乎對曰程子嘗曰封中六爻人人有用聖賢有聖賢用衆人有衆人用君有君用臣有臣用無所不通王昭素嘗爲太祖言之矣講臣非有據豈敢妄出意見東宮因令公爲周易直指置齋閣中廣東布政徐奇朝京師載嶺南土產諸物或得其饋日以進上閱之無公名獨召問公對曰徐奇自都給事中受命赴廣衆皆有詩文以贈其行故有此餽臣不與名者以當時臣病未往贈也今衆名雖具而受否未可知其爲物微甚當無他意上遽命燬其目公歸省過湖中邂逅一張參政者風駛舟上下不能艤舟各舉手一笑竟別抵維揚郡守縣令先日候無耗翌日舟至守令竟不相聞過去訪友人則相與聯寢語達旦自常廩外無別供鄉人得以隻鷄束薪相貽其細如此其大可知也正統初每朝罷

歸邸或正襟危坐長吁不已或獨倚闌立或月下閒行通夕不寐夫人問其故不答一日早朝回忻然喜動顏色夫人問曰每朝回多憂今獨喜何也曰主少國疑擔荷重任懼不克勝故多憂今早見上聰明已能覽章奏決事重任可釋矣正統九年以少師華蓋殿大學士卒年八十黃文簡公准永樂初以中書舍人與解縉輩七人同直文淵閣永樂十二年坐事繫獄凡十年著有省愆集獻陵卽位出獄陞通政使兼武英殿大學士知無不言言無不聽嘗有告黨逆者公曰洪武末年已有勅禁革不宜復舉從之而大獄遂息靖難後吏部例以南人官北土不効順者奏編行伍公曰近有勅旨征討官與舊官事同一體若復追罪南人與勅旨相背上卽罷之虜酋阿魯台旣納款欲收女直土番諸部聽其約束請朝廷刻誓詞於金錠集諸部長磨酒飲之以盟公曰胡人狼子野心使各自爲心則力易制若併爲一則愈難爲矣豈可墮其奸謀上顧左右曰黃淮如立高岡無遠不見爾等如立平地所見惟目前耳西城大寶法王初至京上欲刻玉璽賜之以璞示公公曰朝廷賜諸番

制勅所用不過勅命廣運二寶今此璞大於二寶夷人將謂法王尊於朝廷也上甚嘉之嘗讀廷試卷於上前同列有不直者公必正色直之不少隨順於是人有目公爲太認真者亦不少變也宣德八年公已致仕以謝諭祭塋其父入朝遂留主會試以曹鼎爲進士第二鼎以狀元及第

楊文定公溥洪熙元年以太常學士入閣仁宗初漢庶人潛謀奪嫡離間宮臣公下錦衣獄垂十年家人供食數絕又上命叵測日與死爲隣公勵志讀書不輟同難者止之曰勢已如此讀書何爲曰朝聞道夕死可也五經諸子讀之數回不以貧窶怠難介於中仁宗登極釋公入內閣典機務上欲日近公因建弘文閣於思善門左命公掌閣事上手弘文閣印授公曰朕用卿在左右非止勸益學問亦欲廣知民事爲理道助卽有建白封議以進其倚任如此洪熙改元公方執政其子自鄉來省至京邸公問曰一路守令聞孰賢其子曰兒道出江陵其令殊不賢曰云何曰卽待兒苟簡甚矣乃天台范理也公默識之卽薦陞德安府

知府甚有惠政再擢爲貴州左布政使或勸范當致書謝范曰宰相爲朝廷用人非私理也何謝爲竟不致一書逮公卒乃祭而哭之謝知己云正統十一年以少保武英大學士卒年七十五

高文義公穀正統十年以工侍學士入閣正統乙亥秋順天鄉試劉公儼爲考官有二執政以子入試不中交章奏儼云取不公欲置於法乞詔翰林及六科十三道覆考公時以疾不出一聞之卽強起預考畢毅然入言曰人臣子與寒士並進已不可况又不安於命欲殺考官可乎由是儼得釋景泰初虜數請使迎上皇侵我上谷雲中急廷議相顧忌不能決中書舍人趙榮毅然獨請往公壯榮解金貂贈榮曰子忠義人也上皇將至京公言奉迎禮宜厚會有千戶龔遂榮投匿名書公所公袖入朝傳示羣公卿羣公卿不敢出一言言官疏聞上不喜詰匿名書從何所得公曰得自臣所遂榮恐累公自縛闕下下詔獄上亦不深罪遂榮也裕陵復辟內閣諸臣皆流放竄殛惟公以忠謹故上曰穀在內閣每議迎駕及南內事輒左右朕穀無他可賜致仕公旣歸田杜門不



公拱手大言曰誰敢二心錢娘娘已無後何所利而貳其心乎必欲兩宮同尊者欲全皇上聖德也夏遂再入請命良久出曰俞允矣公執筆加慈懿二字以別之後數日太監覃包至閣曰同尊二母是上位本心非先生力爭幾誤大事同閣聞者深有慙色慈懿太后崩詔議葬所公曰梓宮當合葬裕陵主當祔廟無可疑者遂具疏引漢文帝合葬呂后宋仁宗合葬劉后故事上猶重違母后意公率羣臣跪伏文華殿三請上爲感動始從公議天順末錦衣門達怙寵中傷南陽上曰去賢行專用時內臣或語公公矍然曰李公有經濟才胡遂至此因力辯其誣謝內臣曰李公去時不得獨留語頗聞上南陽事竟雪成化十年以少保文淵閣大學士卒年六十

商文毅公輅正統十四年以修撰入內閣景泰初議易儲公謂此國家大事有皇太后在上臣下誰敢議此明日有旨會多官議附和者衆公爭不可踰歲鍾同章綸相繼請復儲下獄禍不測公因召對力救同綸竟得免丁丑春景皇帝不豫公卽與陳公循倡請復儲以繫人心不允



繼具疏公援筆增二語陛下爲宣宗章皇帝之子當立宣宗章皇帝之孫擬詰旦進至期變作正月十七日也先帝復辟首召慰諭且問改元公對當同循等且請裁定又明日權奸嫉言官撻撻再劾公坐免再起當國因彗見言官有所誣詆公力求退奉旨朕用卿不疑何恤人言至詰責言者唐太宗用王魏朕用商輅何不可欲加譴謫公言臣嘗勸優容言官已荷嘉納如修撰羅倫復請召用今因論臣而反責之如公論何特允所言召公至榻前勉慰再三公登第甫六年卽入內閣預機務公儕輩多有異議而公處之自如尤與錢溥不相能溥至爲禿婦傳譏之亦不與之較其再起也黎淳以景泰中易儲事專歸咎於公上章攻之輅待之無異平時君子謂其有大臣之量云天順初爲石亨等誣陷革職爲民凡十年成化初被召再起未有復職之命陛見戴平定巾絲緋青布員領自稱原藉爲民臣商輅蒙召見朝廷臣謂其妥帖復官內閣首疏八事勤政納諫儲將材飭邊備革冗員設社倉崇先聖之號以配天開人德之基以造士又言文廟從祀諸賢洪武中增董仲舒正統

中增胡安國蔡沈真德秀但仲舒止稱舊官安國等贈諡未稱乞如伏  
勝等封伯爵四年議慈懿皇太后喪禮得祔塋祔廟八年天下大水公  
上弭災七事崇正道謹命令親賢臣慎賞罰納諫諍勵官守恤軍民英  
廟北狩國勢危疑妄有倡議南遷者公力阻之虜逼京城公與文武元  
僚經略戰守遣官撫輯甸居降虜徵各邊帥選兵入授揭榜賊營購虜  
酋僞爲喜寧報誘擒也先書故遺于虜營虜得榜與書果自相疑遜去  
上嘗召見從容議及邸王監國時事公言景泰有社稷功當復帝號左  
右聞者皆泣上亦泣遂下詔上尊諡公因對請立皇子東宮先是悼恭  
太子薨上憂念已而知西宮有子六歲矣公上疏略曰皇子聰明岐嶷  
國本攸繫天下歸心重以昭德宮貴妃撫育保護恩踰已出百官萬民  
謂貴妃賢哲近代無比但外議皆謂皇子之母因病別居久不得見揆  
之人情事體誠爲未順伏望勅令就近居住皇子仍煩貴妃撫育俾朝  
夕之間便於接見庶得遂母子之私情愜朝野之公論上召公擬皇子  
名逾月皇子母薨於永壽宮公舉李宸妃故事爲言得贈淑妃殯殮悉

如禮是年十一月立皇子爲皇太子汪直開西廠羅織數起大獄臣民  
恐悚公疏言近日伺察太煩政令太急刑網太密人情疑畏洶洶不安  
蓋緣委聽斷於汪直一人而直又寄耳目於羣小如常瑛王英輩并條  
直十罪又云直不去天下必危上怒曰一內豎輒能危天下乎太監懷  
恩傳旨詰責甚厲公曰朝臣無大小有罪皆請旨收問渠敢擅抄札三  
品以上京官大同宣府北門鎖鑰守備一日不可闕渠一日擒械數人  
南京祖宗根本重地留守大臣渠敢擅自收捕諸近侍渠敢擅易置直  
不黜國家安得不危恩咋舌退奏上上立命去西廠諸內臣故忌公會  
楊燁董璵事起誣公公不自安同列又輒從旁切擠之公遂請老致仕  
公去萬安得爲首相遂復西廠直益橫諸大臣皆詔事直矣公家居十  
年卒年七十二諡文毅公方果好直言與王文陳循高穀彭時萬安劉  
吉先後共事每遇大議能持正吉嘗曰余與商公處數年未嘗見其妄  
殺一人馬鈞陽曰我朝賢佐商公第一楊文貞李文達不及也  
李文達公賢天順元年以禮侍學士入內閣本年以吏書出福建參政

尋以吏侍再入天順初山東大饑雖出內帑銀貳萬而不足上召賢及徐有貞議有貞持不可曰散銀有弊無益饑者賢曰天下事未嘗無弊顧奉行何如耳散銀有弊而不賑是視民饑死而不拯也因噎廢食豈爲人上之理上以爲然命增銀四萬兩民賴全活者甚衆上一日思建庶人久幽掖庭欲赦之左右以爲不可召問公公曰陛下此一念太祖在天之靈實臨之堯舜存心不過如此上意遂決遣中官衛起居之鳳陽聽其出入自便定遠侯石彪謀出鎮大同諷大同人薦己上已廉其詐會巡撫都御史王宇又劾彪恣肆無忌上怒並逮石亨置于法因問迎復事公曰當時亦有要臣者臣不敢從上怪問何也賢曰天位乃陛下所固有若景泰不起羣臣表請復位名正言順何至以奪門爲功奪之一字何以示後此輩實貪富貴非爲社稷計倘景泰先覺亨等無足惜不審陛下何以自解然天下人心所歸向陛下者以正統十數年間凡事節省與民休息故耳上竦然大悟天順四年春詔以迎駕奪門冒功陞者凡四千人悉褫職五年虜寇涼州莊浪公陳防戒五事上納之

遣懷寧伯孫鏗率兵禦曹吉祥從子昭武伯欽殺人事覺御史劾之上雖見原而下詔戒諭欽懼與吉祥養死士謀不軌因西師行乘機入內爲亂朝臣有憾者輒戕害擊公傷首及耳且持公謂曰某等迫于譏間不得已爲此請入疏以申救公從容曰爾旣殺讎償怨能止戈反正我當言之上得疏乃知公在甚喜旣脫于難上意召公入公手疏曰逆賊就擒此非小變宜詔天下罷一切不急之務且言自古治朝未有不開言路惟權奸欲塞之以遂其非由是陷于大惡而不悟自石亨等排黜臺臣言路閉塞其流弊遂至此極上悉報可是時微有動搖國本之意公力諫不可遂止七年春上以足疾不視朝召公曰大祀將至而疾未愈欲遣官代行可乎公曰亦至壇所雖不能行禮人心亦安上至齋宮復召公曰朕惟俯伏難于起身欲令一人扶之何如公曰陛下能力疾行禮尤見敬天之誠遂卒事而還二月晦夜聞空中有聲明日公密疏曰傳言無形有聲謂之鼓妖上不恤民則有此異惟陛下憫念黎元凡不便於民者宜悉停罷則災變可弭上覽疏卽召公曰此事正須先生

言先生不言誰復言者其具寬恤事條密封以聞公遂疏十事一清掩禁罪人二止銀場煎辦三停歲造紙劄四蠲被災糧稅五弛芻粟徵誅六罷償損失馬匹七飭邊臣撫恤兵民八命有司存恤流移九戒御史糾察貪吏十禁外官因事科斂上曰朕諦觀之皆實惠也宜卽詔天下公又請罷織造清詔獄止各邊守臣進貢停內外買辦采辦上不從公執之數四左右見公力爭皆爲懼公曰古之大臣知無不言今雖不能盡然至於利害繫國家安危者豈可默默以苟祿位邪公爲人恭嚴莊重得時行志不爲小廉曲謹平居無疾言遽色其容粹然見者如在春風中浮譟者爲之自失陰狡者爲之中沮蓋其所養者深故其所得有大過人者論者謂天順以來所以正君德恤民生進賢才廣言路抑僥倖却夷狄皆公之力云三楊之後文達一人而已成化二年以少保華蓋殿大學士卒年五十九天順間曹吉祥奸預國政四方奏事者必先造其門上覺密謂公曰奈何對曰自古人主權不可下移若陛下每事自斷則彼漸不敢預而趨附之人亦自少矣上曰然無此相礙何事不

順初朝議薦公入閣翰林黃諫卽來見公曰恭喜先生入閣公曰此何喜也諫曰何爲不喜公曰昔者寇準問王嘉祐外議何如對云丈人早晚入相以予言之不如不相之愈也準曰如何曰丈人負天下之望卽入相天下以太平責之丈人自料君臣若魚之有水乎準深服之以爲高見遠識時事如此入閣何爲未見其可喜也英宗旣復辟亦心知享吉祥輦之非但以初復位亭等自以爲功日在左右只得徇從旣而曰近日主張行事皆是徐有貞一人李賢在朕前未嘗有妄言今與有貞同謫於心不堪卽召王翱曰李賢不可放去還欲用之故有吏部左侍郎之命賢曰上之復位天下人心無不歡戴若無亭輦攪擾左右前後皆得正人三代可復不幸遇亭輦讒言一入未遽能數年之久言路猶塞所謂開國成家小人勿用可不戒哉上視朝左右顧必呼公與錦衣門達語良久乃已江南北大水請下寬恤之詔詔中采柴一事歲省銀三千餘兩章皇后崩卽靜慈仙師景帝廢后也值冬享太廟上念之以問公請俟釋服更諡恭讓章皇后錦衣門達寵而橫許臨川弋陽二王

陰事訊無左驗公請戒緝事者達又誣袁彬下彬獄有疏雪彬者達又并誣疏出公公乞罷不允未幾達坐附中官謫戍嶺表時禁中有讒言謂茂陵不宜復在東宮者上疑之一日上不豫臥便殿召公諭曰今庶事頗寧而大者反搖奈何公頓首伏地曰此國本也上曰然則必傳太子位乎公又頓首賀是宗社幸甚上起立召太子至公扶太子曰謝謝太子謝上抱上足泣上亦泣讒竟不得行災異屢見公請出宮人又請簡近左右侍入大風電拔郊壇木飄瓦公上疏乞無狎左右聽其冒誘吳后廢飛語欲害公上遣衛士宿公家出入呵護會奪門功冒陞者又羣譟訴乞復官公力爭得允按籍禡官太平侯張瑾興濟伯楊宗皆奪爵天順四年上諭選庶吉士必北方人公曰立賢無方何限於南北政務任九卿議擬不相侵奪時于上前參酌可否爲行止王馬二公在吏兵部皆上信任公又能調護以是兩尚書得行其志景帝葬時左右請汪妃殉公請存以全其母子上又欲赦建庶人出上于大內見公公對曰善左右或危言動上上皆從公遷汪妃於外邸出建庶人吳庶人于



中都公初入內閣太監曹吉祥在左順門令人請說話公語云聖上宣召則來太監請則不來曹怒令二火者掖而至公云太監誤矣此處乃天子顧問之地某等乃謹候顧問之官太監傳聖上命有事來說自合到此豈可令人來召耶曹云吾適病足耳先生幸恕罪也公愛惜人才惟恐弗力而以獎恬退厲名節爲先禮部侍郎缺禮部郎中李和求近習薦之上問公何如對曰不知其人臣所知者學士李紹可任但邇者士風不立多夤緣以求進如若用紹請于黼座前令吏部來面令之庶幾士類知警上從之命下之日傾朝懷然成化初有言者極詆中官之惡得補外或咎公不申救公曰事不可激也甘露之變黨錮之禍諸君獨不知之卽成化丙戌廷試進士公取羅倫爲狀頭憲廟卽位公丁父憂乞終制不許羅倫進言請許公終制詞涉詆訐公怒力辭朝廷竟罪倫時有引文彥博待唐介故事請公留倫者公曰潞公市恩歸怨朝廷吾不可襲此此言未爲無理

呂文懿公原天順元年以通政司參議兼侍講學士入內閣時緝捕匿

名謗毀朝政者未獲石亨勸上出榜募能告捕者賞以三品職上令內閣撰榜格公與修撰岳正見上曰爲政有體盜賊責兵部奸宄責法司豈有天子自出榜購募之理且堯建進善之旌舜立誹謗之木秦始皇護短杜諫乃下誹謗之令由此過失不聞遂至亡國陛下當以堯舜爲法以秦始皇爲戒緩則人情怠忽事自覺露急則人情危懼愈求輶晦不如勿究上是之天順六年卒四十五

岳文肅公正天順元年以修撰入閣本年謫欽州同知又戌甘肅起官歷興化知府在內閣日欽天監湯序言變異謂奸臣未盡之故上以問公公曰姦臣未聞欲求之將人人自危且序術疏淺不足信事遂寢錦衣衛官校選得一僧自言當大貴衆惑之至妻以女以覲非分獄具當坐反牛玉援近例請官選者公謂事縱得實不過合妖言律治其從十數人選者准應捕律朝論寢之亨從子彪鎮大同遣使獻捷內閣詢其狀其人盛陳戰伐且稱斬首無算皆梟于林木不能悉致公取地圖指示曰某地至某地四面皆沙漠梟于何所其人驚伏上皇復位公改修

撰吏部尙書王翱薦正宰相才召對文華殿神采秀發上遙見遂曰好  
正登殿又曰好問年幾何對曰四十又曰正好問家安在對曰潯縣又  
曰朕北方人也甚善問讀何經對曰尙書曰是書經尤善問舉進士科  
對曰正統十三年上益喜曰朕故取汝朕今用汝內閣許彬老矣不足  
恃汝爲朕努力公頓首受命出赴閣至左順門遇石亨張軫愕然問曰  
何爲至此公不對二人者忌公才名比見上上又言朕今擇一內閣甚  
佳二人皆請爲誰上曰岳正顧正官小須與吏部左侍郎兼翰林學士  
二人皆佯頓首賀陛下旣得人俟果稱職進官未晚上默然然時時召  
見公入內閣感上知遇銳意功業知無不言言必盡肝膽云英皇召而  
問曰卿何以輔朕公曰今內臣武臣權重上領之曰已喻公退告曹欽  
石彪令謝兵歸第不然上將有疑心二凶走告太監吉祥吉祥詣上垂  
泣免冠請死具道所由上曰無之乃召公責其漏言公曰固也臣觀二  
家必有反叛之滅卽今無可按之誅吾欲全君臣共難之情故令早自  
爲計又言曹石驕橫不早制恐禍起肘腋上諭正汝往見告朕意公徑

造亨所諷令戢斂二人者謂公許吾短顧以上意劫吾益大恨時亨與  
豎吉祥表裏擅權有匿名投書指斥時事罪狀吉祥獨不及亨吉祥怒  
力請上榜購告捕者官三品公見上曰爲政有體捕盜賊責兵部姦宄  
責法司朝廷豈可自榜購募且緩則人情怠忽事得覺露急則人情恐  
懼愈求輶晦不如勿究事遂止承天門災下詔罪已公歷數弊政詞極  
切直二人者飛語岳正草詔出對人言此非上意我欲諷上改過也正  
竇直訕君父如此不數日內批降公欽州同知公便過家辭母留數日  
兵部尚書陳汝言者黨二人又憾公嘗言其不可用途嗾邏者中公以  
陰事逮詔獄考掠謫戍肅州鎮夷所未及行季鐸都督竟奪公廬時猛  
虎石者太監鎮河西上密諭石岳正須生不須死四年石坐法誅明年  
曹又反誅上思公言解士伍放歸田茂陵卽位言官請復公官吏部擬  
調南京上曰勿調留院充經筵講官未幾南陽欲薦公南國子祭酒公  
不應忌者僞爲公劾南陽章示南陽遂大疑公成化元年廷推公及都  
給事張寧爲兵部清黃官不得陞興化知府公勤力民事興修水利積

穀出羨餘補助民役興化士人規利弗遂者騰謗書彭惠公安獨曰太守節財愛民無他也三年來朝乞致仕時季鐸敗朝廷乃還公故廬未幾卒公再起再廢自贊其像曰有傳天語曰岳正倒好只是大膽惟帝念哉必當有感如或赦汝再敢不敢臣嘗誦古人之言蓋將之死而靡憾也嘉靖中乃贈太常卿諡文肅

劉文和公翊性剛直善談經在講筵最久當時講官稱爲第一受知于上成化十四年簡入內閣持廉秉公無所阿私抑邪嫉惡恆過于嚴以是小人多怨凡所建明入告於上出不語人鮮有知者上雅重之呼爲東劉先生特賜圖書其文曰嘉猷贊翊然好談論不知者或目爲狂躁云公又不拘於曲謹而有大節成化中欲易儲召內閣諸輔臣議他莫敢言公執不可上命出公立不退必欲得命上悟從之史冊不載成化十三年項忠奏劾汪直草疏令武選郎中姚壁持赴冢宰尹某請署名尹曰本兵部所撰當以兵部爲首壁曰公六卿之長當以吏爲首尹怒曰今日讒認得六卿之長旣署名卽遣人報韋瑛曰本兵部所寫尹但

以次居首耳又數日都御史王某遇公及劉吉於早朝某曰汪直行事儘公道如黃賜專權納賂非直誰能去之且商萬二公在任久是非多故有所忌憚公入閣幾日况直又扶持何爲亦論列乎公曰不然吾等言事爲朝廷非爲身謀也設使汪直行事皆公道朝廷置公卿大夫欲以何爲天下後世謂此爲何等時耶王某無以應

尹文和公直成化二十二年以兵侍入閣纂修英宗實錄時同事者書景泰中事欲不書帝止稱貶號爲郕王者至指漢昌邑更始爲比公力辯之曰實錄中有初爲大臣後爲軍民者方其在官必書某官某旣罷去乃改稱某如漢府以謀逆降庶人其未反時必書府書叔至黜削乃書庶人且昌邑未踐祚景泰則祀郊廟主華夷七年更始無所受景泰則受令母后而當時內外危疑非景泰則北京非國家有雖謬爲易儲之事然能不惑虛忠徐振之言卒全兩宮以致今日是功固可予也總裁官以公議請於上尋被旨景泰爲皇帝時事皆從實書因卒稱帝厥後景泰復證皆由公此論啓之也又實錄中景泰建儲事多僞言誣執

政公復執奏疏辯正之且謂信史豈可傳會中傷人若是邪遂從竄正三月陪祀四陵時以秀王主祭而陪祀官循舊分陪公言於禮官曰往時命官主祭諸陵各有主祭官分陪固宜茲殿下通行四陵陪祀者尙可分邪禮官愕然遂從公議丁未正月郊分獻夜壇明日甫慶成貴妃萬氏薨先是皇太子擬二月五日婚至是以喪禮欲易婚期公執言庶母無服而主婚在上與皇太后婚期竟不易上又以貴妃斂宜服黃公言貴妃素稱知禮豈可以不正之服加之上因欲以后禮葬公言貴妃無可贈以后之道苟妄爲之天下後世之議不免於死者竟何益邪亦卒以貴妃葬占城王古來爲安南所逼棄國來求援禮部尙書周洪謨請命廣東藩臬送之還國公詰還國遭殺何如洪謨曰於彼殺之我無預矣公曰中國爲四夷主乃棄之邪宜選大臣至彼詢擇從所宜庶不失遠人之望因簡都御史屠鏞以往時韓王內史李穀等不欲居韓王府一日相率作令旨開城門挾弓跨騎越關赴京師錦衣捕獲之穀等出懷中奏辭許王過所司請勘王公以穀等不安王府逃還此拒上命

罪一詐傳令旨乘騎開門罪二越關罪三撻拾王小過當殺罪四彼既負四罪又聽其虛言以勘王是重一罪者而輕宗室矣遂押還韓王府時論是之二月主考會試時上方建永昌寺雖言者紛然上銳意不肯輟公言天旱災赫人多渴死工役不休民心咨怨致旱之由也况雨屬水而土木工興則掩水乞罷之上卽日出旨輟其工繼以旱久議不寬恤令公言赦不宜數要在自省今佛子法王費供給宮中齋醮太繁而宮人亦頗過衆宜加裁省以回天意由是法王佛子飲饌宮中齋醮皆省削而放宮人若干逾三日雨上出牙骨摺扇繪魏徵像并書御製良臣頌以賜徽府承奉李祐又誣訐王過上欲下詔切責王公謂李祐等蔑視勅書不爲王用及王言其非乃指王過刼之此大罪也王何責之有上從之成化二十三年八月上不豫公率衆問安且附奏曰聖躬必靜心調攝爲美願皇太子視事御文華門臨百官二十二日上崩諸內侍謂詔當稱太后公意此歸權宮闈之端也遽曰遺旨舊未嘗有此因以英廟遺詔草示之乃得已旣而擬以九月六日太子卽皇帝位時傳



言太子憾萬妃將禍其家而少保劉吉則連姻萬氏者吉懷疑思挾奸力言須緩期公慮叵測力告萬安如所擬劉謂衰經未除何可卽位公毅然曰古人柩前卽位事固有大於守禮者因連章勸進竟以六日奉今皇御大寶請去諸傳奉冗員追奪舊進寶石得濫賞者斥佛子法王輟永昌寺減光祿羨費天下翕然仰更新之政矣皇親萬喜得罪廷議請從中鞫問公謂若是則事體重大萬氏得罪深恐傷先帝之心因擬輕宥衆論服其得大體衆議皇妣誕育聖躬禮宜祔塋祭公曰祔塋可以祔祭則太皇太后皇太后謁廟不免有嫌宜祭奉先殿別室俟他日追祔丙申二月南京地震公率諸大臣陳一十八事曰策免大臣沙汰冗員綏治南畿清理軍伍弭靖賊盜減省內費輟禁濫賞罷止宮醮卻過貢獻簡命將官稽省造作考查柴炭嚴防邊釁抑制法王禁限服色除增白粳嚴肅門禁預養牛牲裁簡驛遞禁役軍工執筆抗疏詞極剴切多扼中貴同列頗以爲難公曰自我執筆請任其愆竟不肯竄易一言上亦嘉納之宣府左衛檄送僧行百五十人請給度牒公省其人則

軍舍也曰此邊衛賴以屯守者其可空什伍以充梵刹乎尙書鄭幹稱糧給數紙以副其意公執不可上其議上從公禁止以先是僧道錄司嘗因近習乞恩普度至是上以公議示部卻之及僧道錄堅以爲請下禮部公論參究治如法士論翕然稱快諸寺號番僧都綱禪師等沒其徒必請襲職舊宅從之公創議舊有印勅者得襲餘不許及中貴奉旨詢禮部度僧之數且舉額爲言尙書語不論公進曰舊額府不過四十四縣遞殺其十前給度不啻數十倍豈可復度僧耶度僧事亦寢十月朝當審囚中有毆妻死至大辟公謂人以無子娶妾遭妻悍忿毆之初恐絕嗣今顧絕其命耶世之妬婦凌夫以絕人嗣者且長氣矣衆翕然書可矜得不死庚子九月審死囚有長兒者案具殺人死公訊之則長兒年十四歲時賈人子孔暹相戲毆繼而暹以他故縊死暹兄誣長兒因焚其屍既有疑且長兒年十四未有殺人意情可矜有孫鑾者案稱以柳棍毆人越二十三日死當伏誅公曰律言以他物傷保辜止二十日今越限且三日何可坐俱得免壬寅秋陪祀帝王廟公因言元世祖

以胡人入中國初欲殺盡中原人甚至廢滅人倫豈當與堯舜禹湯並列殆高皇帝念先世嘗爲其民乎然終當改正也二月以修葺郊壇工畢祭告天地時成國公朱儀主祀事禮官議當拜大祀殿內公以皇上時享太廟拜丹陛遣官祭歷代帝王亦拜丹陛成國不尊于皇上帝皇不嚴于天地願可拜殿內乎成國從其議成化二十二年以太子少保兵書致仕年八十卒

徐文靖公溥成化二十二年以吏侍學士入閣在內閣十餘年王文恪公整曰文靖公以仁厚養國體以名節勵士風匡救將順恆以正君德爲先其所謀議必欲慎守成法或勸其有所建白公曰國家法度皆我祖宗神謀廟算其所以惠元元者甚備患在不能守耳豈宜更張薦拔人才常若不及一善一能無所遺棄或有過誤曲爲掩護惟恐不爲完人嘗曰天之生才甚難以微瑕而遽棄之吾不忍也公在內閣承劉吉恣威福報私怨之後一以安靜誠信中外咸寧行政不必出于己惟其是用人不必由于己惟其賢時稱其休休有大度安南侵占城占城國

王遣使入奏請命官往問其罪上欲從之公上言春秋王者不治夷狄安南雖奉正朔修職貢然恃險負固積歲已多今若遣官往彼國海島茫茫徒掉寸舌小必掩過飾非大或執迷抗命若置而不問損威已多若問罪興師貽患猶大宜弗聽乃止既而中官傳旨命內閣撰三清樂章公復上言竊惟天子祭天地夫天至尊無對故禮以少爲貴祭不過孟春牲不過特牛漢祀五帝儒者非之況三清乃邪妄之說謂一天之上有三大帝乃以李昉居其一是以人鬼列于天神非禮也至于郊祀樂章皇祖舊製今所傳樂章雖載永樂大典是書博采弗精不可以黷禮臣等誦習儒書若邪說俚曲尤所不習且初設文淵閣命學士居之者實欲其謀議政事講論經史培養本源糾正闕失非欲其阿諛順旨以取容悅也爲此具本奏聞上嘉納弘治八年欽天監正李華者不職罷忽傳旨復職公言皇上卽位以來大小陞除皆出題擬別無內降指揮以故干請斷絕華選張巖葬地有勞宜量與賞齎傳帖旣行侍門遂啓臣等不敢阿從十年三月韋太監急走內閣言上坐文華殿宣四先

生公及劉李謝三公倉卒問故韋對不知公等至殿頓首上曰近前公等前諸司禮皆環跪御案傍上曰看文書諸司禮取諸司題奏與公及劉公以片紙數幅與李謝二公每一疏上必曰與先生輩議公等擬批答上上覽或更定二三字或刪去一二句應手疾書略無疑滯公等懼不能稱上意頓首請曰疏中事多者臣等請將下將看詳擬上上稍不悅曰文書尙多欲盡閱閣中亦閑盍就此面議諸輔臣又頓首唯唯自裕陵召見南陽等後四十年茂陵及泰陵初歲不過一二見道二三語是日公等得見上天質明睿聖心仁厚大喜願應對不能副上意又輒慙懼自是不復召上初卽位公卽疏請止貢獻罷工役黜異端屏儉邪登用老成一時善政傾動天下耳目雖出宸衷獨斷而公贊相弼成之功居多時有大臣罷廢家居者夤緣謀復起公力持其議不得行

劉文靖公健成化二十三年以少詹學士入閣弘治十一年三月監生汪瑤奏言劉健李東陽杜絕言路掩蔽聰明妬賢嫉能排抑勝己急宜斥退公與東陽疏言近日兩京科道指陳時弊并劾奔競交結乞恩傳

奉等官雖未盡當數多可採乃漫無可否概不施行自祖宗朝至今未  
有此事皆臣等因循將順苟避嫌疑不能力贊乾剛俯從輿論別白忠  
邪明正賞罰以致人心惶惑物議沸騰草野之下其言乃至于此乞罷  
上不許下瑤詔獄公又上疏力救瑤得釋十八年二月上召閣臣劉健  
等至煖閣公等因奏曰今國帑不充府縣無蓄邊儲空乏正公私困竭  
之時鑄錢事最爲緊要其餘若屯田茶馬皆理財之事不可不講也李  
公東陽因奏曰鹽法尤重今已還盡各邊開中徒有其名商人無利皆  
不肯上納公因極論奏討之弊上曰奏討亦只是幾家東陽曰奏討之  
中有夾帶奏一分則夾帶十分商人無利正坐此等弊耳上曰夾帶弊  
亦誠有之公又言王府奏討亦壞鹽法每府祿米自有萬石又奏討莊  
田稅課朝廷每念親親輒從所請常額有限不可不節上曰王府所奏  
近多不與公對曰但乞今後更不輕與則不敢奏矣公因奏曰臣聞國  
初茶馬法初行有歐駙馬者販茶數百斤太祖高皇帝曰我纔行一法  
乃首壞之遂寘極典高皇后亦不敢勸此等故事人皆不敢言上曰非

不敢言乃不肯言耳因言鹽法須整理公與謝公遷等贊曰請下戶部  
查議上曰然明日降旨云祖宗設立鹽法以濟緊急邊儲係國家要務  
近來廢弛殆盡商賈不行各邊開中雖多全無實用戶部通查舊制及  
今各項弊端明白計議停當來說于是中外稱慶知上思治勵精皆公  
之力也正德元年以少保華蓋殿大學士致仕忌者媒孽幾中奇禍公  
杜門不出過客請見一切謝絕卒年九十四公及李公東陽謝公遷同  
在內閣公敢於任事東陽長于爲文遷直亮明斷可否其間不阿不激  
同寅協恭所以成弘治十餘年之治公與馬文昇許進焦芳李鏐皆河  
南人雖同鄉而不相阿比進士何景明年少能詩人咸以爲首相同鄉  
必選入翰林無疑公曰此子福薄能詩何用不取後景明除中書舍人  
遷提學副使不壽卒自來居內閣不私鄉故惟公一人公初在翰林閉  
戶讀書交遊稀寡衆謂公木強人已入閣益練習國家典故人又謂公  
有經濟才當是時萬安劉吉相繼去宜興瓊山與公在內閣公正色簡  
言廉靖不肯依違時上方勵精宜興去召公及李謝二公至文華殿平

臺煖閣面議大政如吳一貫張天祥獄睿皇后陵寢殿禮進退五府四  
營公侯伯災異去留大臣皆上前相可否三人同心時人語曰李公謀  
劉公斷謝公尤侃侃先是公率同官上疏近有旨令中官往武當山設  
像懸幡修醮命臣等撰勅并祝文者竊聞茲山宮觀像設已極壯麗復  
有此舉實爲無益矧今災異迭出生民困苦苗賊肆亂軍旅方興轉餉  
繕兵猶恐不給君門萬里豈能悉知宜斥邪妄以遏無良十七年又率  
同官上言近有旨朝陽門外修建萬壽塔者臣等竊惟人主信佛莫梁  
武帝爲甚卒餓死臺城信老莫宋徽宗爲甚卒囚斃虜地本以求福反  
以致禍觀諸往事可爲鑒戒我祖宗相傳以治天下者堯舜周孔之道  
而已似此異端盡財惑衆何關于治佛塔之役非所以訓天下垂後世  
也又令撰真人杜永祺等誥命及封號疏言臣等竊惟異端不可信誥  
命封號不當與夫誥命朝廷所以獎貞勵能雖卿士大臣必待秩滿考  
最乃得頒給况祖宗廟號不過十六字親王及文武大臣有功德者謚  
號止一二字此輩何賢何能封號多至十八字流布朝野傳聞後世皆



曰此朝廷所賜予儒臣所撰擬天下後世其謂之何上時憂勞思治益  
明習機務眷念民瘼欲盡革諸煩苛弊盡召對輒屏左右左右不得聞  
大懼竊從屏隙中觀但聞上數稱善上仁慈敬慎尤欲守成法惡慘核  
公等亦見太子未壯上體清癯恐一旦禍起不可測務卻謀遠顧省機  
密發使天下隱受其福至上語及宮中事毅然欲創抑之刷洗近侍權  
復高皇帝舊然亦未敢輕動也上遽病外議籍籍謂禍本有所起也上  
大漸召公三人入乾清宮受顧命力疾起坐寢榻語在李公傳中康陵  
卽位新政猶肅未幾劉瑾等導上遊戲廢政公三人上疏極諫請誅瑾  
等不報又與諸大臣伏闕門諫焦芳洩于瑾瑾得先見上泣請并斥言  
諸大臣過欺官家幼冲上果疑怒諫竟不得入公因乞致仕謝公亦去  
焦芳遂入內閣自是好黨益熾羣小附之盡逐諸骨鯁卿士大夫瑾尙  
恨公不已矯旨奪公官罰翰栗瑾欲起大獄盡殺諸不附己者矯勅羣  
臣指內官王岳范亨徐智公及謝公洪洞韓公文浮梁楊公守隨張公  
敷華林公瀚郎中李夢陽主事王守仁王綸孫槃黃孔昭檢討劉瑞給

事中湯禮敬陳震徐昂陶諧劉蒞艾洪呂翀任惠李光翰戴銑徐蕃牧  
相徐暹張良弼葛嵩趙士賢御史陳琳貢安甫史良佐曹閔王弘任諾  
李熙王蕃陸崑張鳴鳳蕭乾元姚學禮黃昭道蔣欽薄彥徽潘鏗王良  
臣趙祐何天衢徐鉉楊璋熊卓朱廷聲劉玉爲奸黨榜朝堂公公益懼杜  
門謝客瑾誅得復官致仕比上數巡邊幸江南輒泣不食飲曰吾死無  
以見先帝矣

丘文莊公濬弘治四年以太子太保文淵學士入閣英廟實錄成或謂  
少保于謙之死當著其不軌之迹濬曰己巳之變微于公天下不知何  
如武臣挾私怨謗豈可信哉功過皆從實書之及入內閣復三疏固辭  
不允始奏請擇衍義補中要務行之上見納乃就務以寬大啓上心忠  
厚變士習凡人才進退政事廢舉一惟祖宗舊典是循五年天變上疏  
大概論上改元之初歲在戊申與洪武初元同符宜釐革庶政盡復舊  
規因擬二十二事陳時政之弊其略曰成化間彗星三見遍掃三垣地  
震無慮五六百次邇者彗見天津地震天鳴無虛日且異鳥三鳴于禁

卽考諸經史天變莫大於彗孛在三垣三台尤爲重地變莫大于震動在京師邊防尤爲危急矧禽鳥動物得氣之先春秋二百四十二年彗孛者三地震者五飛禽者二今乃屢見於二十五六年之間變不虛生必有其應臣願體上天仁愛祖宗基業端身以立本清心以應務謹好尙勿流于異端節財費勿至于耗國公任用勿失于偏聽禁私謁以肅內政明義理以絕姦邪慎儉德以懷永圖勤政務以弘至治庶可以回天災消物異疏凡萬餘言上命諸司議行又請訪求遺書上皆嘉納洪武永樂以來凡百司朝覲命吏部都察院考其尤不職者乃黜之不過數十人其後吏部患人言務以多黜爲公方岳以下少有微瑕輒黜之黜者亦不敢訴公深知其弊言于上曰唐虞三載考績三考黜陟今有居官未半載而黜者所黜徒信人言未必皆實此非唐虞之法亦非祖宗舊制也上深然之會吏部上大小庶官當黜者幾二千人乃勅凡歷官未三載者俱復任雖經一考非有貪暴實跡者勿黜蓋用公之言也弘治八年以少保武英殿大學士卒年七十六入仕四十餘年位極人

臣自處若韋布產業僅能卒歲第宅不逾齊民所得俸賜卽充官費絕無贏餘在閣尤嚴慎比卒閱其歸裝惟所賜金幣及圖書數萬卷而已李文正公東陽弘治八年以禮侍學士入閣時科道官劾近侍二人召公議所當去留者且出諸司題奏令一一擬斷親賜可否自是始復奏事之制云公以病不良於行臥家懇辭上偶違和乃力疾出尙寶卿崔瑒御史姚祥張或主事張偉給事中安奎各因事被繫權閹劉瑾方欲示威俱令枷號公奏各人所坐自有本法枷號重典不宜濫施俱得寬釋一日早朝有文書一卷投於丹墀錄瑾過惡上命瑾等詰問無肯承者遂執朝官三百餘人送詔獄公奏此事必一人所爲同朝諸臣倉皇拜起豈能知之一人之外皆無罪之人又盡得釋瑾立苛法公卿重足立道路以目分遣微卒四出逮捕眞僞莫辨遠近驚悚爭以厚賂祈脫禍公上疏極論之大忤瑾意然亦稍稍戢瑾又患盜賊日滋欲并其家屬俱坐編戍公言爲盜之人惡心猝動雖其父兄有不預知自古罪人不孥若玉石俱焚何以開自新之路于是皆從未減有微卒捕盜不得

并其無服親執送官法司承風旨概坐以籍沒發遣公謂卽如新例亦不宜連坐乃今改擬如律又有以例前盜援新例處分者悉止不行所全活者不知幾何有興化守者亦公門下士以覲事至京絨兩帕四扇令從吏饋公公曰扇以染翰固可但多帕奈何吏頓首于庭乃啓絨取扇而歸其帕卽此一事古風可想詳見張東沙芝園集中公致政後遽菴楊公載酒肴過公懷麓堂爲壽觴以金公訝曰公近亦有此器耶遽菴有慚色自是不敢用趙司成永京師人一日過魯學士鐸邸魯公曰公何之司成曰憶今日爲西涯先生誕辰將往壽也魯公曰吾當與公偕公以何爲贄司成曰帕二方也魯公曰吾贄亦應如之入啓笥索帕無有躊躇良久憶里中曾餽有枯魚令家人取之家人報已食其半魯公度家無他物卽以其半載與趙公俱往公所稱祝公烹魚沽酒以飲二公歡甚卽事倡和而罷耿定向曰公仕宦五十餘年柄國且十有八年矣鄭端簡公謂公卒之日不能治喪門人故吏贖金錢賻之乃克塋又嘗過其門蕭然四壁不足當分宜輩一宴會之費則公平生所以視

身者又可知已彼時權璫狂劇公卿鮮不受其螫者而卒不敢有加于公公豈有權術牢籠之哉毋亦貞操潔履有以服其心耳每日朝罷則門生羣集其家皆海內名流其坐上常滿殆無虛日談文講藝絕口不及勢利風流儒雅亦足領袖一時嘗冬月五更入朝至長安街值編修崔公銑方在道上酣飲銑拱立于轎前曰請老先生少飲數酌以敵寒氣公卽下轎連進數觥升轎去王元美藝苑卮言亦載此一事夫宰相憐才愛士脫略勢位如此風流世豈能多見卽書籍所載古之宰相亦未有如此者正德七年以少保華蓋殿大學士致仕卒年七十

謝文正公還弘治八年以詹事學士入閣正德元年以少傅武英殿學士致仕嘉靖六年以謹身殿學士復入費文憲同在政府文憲以衰病將乞休曾具疏舉公自代文憲去而遼菴楊公又以公薦意若虛元佐以遜公者天下皆相慶公復入而賢遼菴之能讓也時公居母喪服闋還京而遼菴以官視公爲尊不肯處公之下乃竟違初志輿論頗少遼菴然公盛德不與之較公初入翰林御史某驟陞都憲臺中循例請公

文爲賀公曰此人素不爲公議所與我何可以諛言悅之竟不應其狷介如此荆襄等處流民屯聚生育莫可數計而混無名籍成化所區處失宜幾至大變公深以爲憂每與戶部議思有以處之後司徒韓公文言上命刑部侍郎何公鑑經理其事公撰旨令隨宜安集附籍還鄉各從其願附籍者終令得所編戶已三十餘萬復有沮其事者遂中止識者恨之未幾果叛時虜犯大同兵部尙書馬文昇以國用不足奏請于南方折糧銀內更加銀若干公執不可上言曰南方稅額甚重宣德正統間因民不堪命故立折銀法以寬之今更折色重於本色民益病矣且足國唯在節用用不節加賦何益不謂文昇而有此奏也其事竟寢時同在內閣者劉公健敢於任事而資公之謀斷李公東陽長于爲文而資公之典則公于其間不激不隨輔成盛治弘治末疏乞致仕薦吳寬王鏊以代言極懇至一時恬讓之風感動中外孝皇大漸召公等受顧命正德初近習蠹政韓公文率百官伏闕論之公等主張于內將寘于法事泄不克公再疏乞休去而焦芳入閣劉瑾擅權二人深相結納

欲甘心于公人皆危之公曰天佑皇明計當無他不見劉元成之事乎處之裕如日與客圍棋賦詩時以自娛瑾誅詔復原職致仕嘉靖六年復起入閣尋卒年八十二贈太傅

王文恪公整正德元年以吏侍學士入閣在內閣日武宗諒闇內侍入人荒遊亂政臺諫交章中外洵洵公協韓司徒文率文武大臣伏闕以請上大驚怒有旨召公等至左順門中官傳諭甚厲衆相視莫敢發言公曰八人不去亂本不除天下何由而治論議侃侃韓亦危言繼之中官語塞一時國論倚以爲重然自是八人者竟分布要路瑾卽入柄司禮而韓公見逐內閣劉謝二公亦去矣瑾方威鉗士類按索微瑕輒枷械之幾死者纍纍公亟言於瑾曰士大夫可殺不可辱今旣辱之又殺之吾尙何顏於此由是類從寬釋瑾銜韓公文不已必欲置之死無敢言者公於衆中大言曰韓公濟忠粹德天下所知萬一犯非其罪如萬世公議何瑾又欲以他事中內閣劉謝二公公前後力救之乃皆得免大司馬華容劉公大夏在廣西嘗易置土官岑氏瑾以舊怨逮至京將



坐以激變士官岑氏罪死公曰岑氏未叛何名爲激變乎劉得減死或惡石淙楊公於瑾謂其築邊大費屢以爲言公曰楊有高才重望爲國修邊乃可以功爲罪乎瑾議焚廢后吳氏之喪以滅迹曰不可以成服公曰服可以不成葬不可以苟景泰汪妃薨擬具禮公曰妃廢不以罪宜復其故號葬以妃祭以后皆從之當是時瑾權傾中外雖意不在公然見公開誠與言初亦間聽及焦芳專事煥阿議彌不協而瑾驕悖日甚毒流縉紳公遇之不能得居嘗戚然瑾曰王先生居高位何自苦乃爾耶公曰求去瑾意愈拂衆虞禍且不測公曰吾義當去不去乃禍耳瑾使伺公無所得且聞交贊亦絕乃笑曰過矣於是懇疏凡三上上乃許之正德四年以少傅武英殿大學士致仕賜璽書乘傳歲卒支月米年七十五

楊文忠公廷和正德二年以南京戶部尚書召入內閣先是公以詹事領內閣誥勅爲日講官時劉公健謝公遷去位姦瑾劉瑾用事公侍講筵惓惓以遠小人戒遊逸爲言左右讒之又有陰結近侍者阻公遂改

南京吏部左侍郎命下數日卽行瑾使還者伺公將中之反報云楊初無怨怒乃止一日上退朝思公問曰楊學士何在瑾對曰今爲南京戶部尙書上曰楊廷和已入東閣戶部豈翰林官耶明日有勅取公回馳驛來京改兼文淵閣大學士往時劉仲質等以尙書任之然不典機密其後李賢王文繼以尙書都御史入景泰天順間故事也正德二年四月慶府安化王之變自夏州反以誅劉瑾爲名公謂李文正公曰宜請頒黃榜開諭寧夏之人及慶府宗室或阻之曰黃河之舟盡爲寘鐸驅去卽有榜誰與傳之公曰此事夏人不與者十八九若爲寘鐸所脅無以慰之得無爲寘鐸樹黨耶亟請于上行之又擬用仇鉞爲將或云鉞已從寘鐸矣公曰鉞素稱謀勇不幸在亂城中未必從亂朝廷用之豈不幡然思奮亦使寘鐸自生嫌疑將內潰矣未幾鉞果擒寘鐸以自效焉正德六年北畿流賊劉六劉七齊彥明陷郡邑殺良民諸將莫能禦朝議起左都御史馬中錫爲總制往討之公曰馬文士也豈堪是任乎衆違其議用之竟債事參將桑玉領大軍追劉七於村中窘甚將自經

於民舍其黨止之曰賂或可免乃投金樓下桑受而縱之公言於上下中錫獄斬桑玉以侍郎陸完代之軍威大振旣而趙風子邢老虎劉三羣賊復起河之南北衆數十萬官軍屢敗公意用邊軍勦之衆議未協翰林學士陳舜奏記于公曰內地腹心邊關四肢役四肢以驅腹心之疾何不可公行其言以都御史彭公澤爲總制兩總制破賊刻日可平豹房義子多與諸賊交通有通事王永者得幸左右中秋日潛引齊彥明見上於豹房事發下永獄杖殺之義子黨訴於上將罪原問主事張元電公曰刑官知有大明律耳事得解盜亦平正德八年四川流賊鄢本怒廖麻子作亂又以彭公澤總制征之將行請授方略公曰君才平賊無難但忌班師早也彭問其故公曰往時福建鄧茂七湖廣劉千斤二賊授首餘黨復作以班師太早耳彭至踰年而賊平會變起西夏朝廷復命彭以往至漢中內江胡小二等又作亂彭歎曰石齋眞聖人也寧府陰結近習獻燈於內又欲遣人張設公語文書房官曰王府無獻燈之例禁中非擅入之所恐有好謀不可不防尋請復護衛公極諫上

謂伊祖以謀逆而革劉瑾復之方革豈可又從其請費公亦極言之時寧府厚賂諸權要錢寧輩主之旨竟從中出焉正德八年父留耕少保公卒于家計聞有旨問輔臣丁憂留用事例你該部查看來說公數疏乞歸守制奉旨卿屢乞守制情苦詞切今暫准奔喪寫勅給驛葬畢即來供職卿弟廷儀也着馳驛去遣行人呂律送歸禮部郎中祝鑒諭祭工部郎中王孝忠治塋域閤臣之得終父母服自公始也公既歸上每臨對左右言何如楊先生有主張居無何上遣少監秦用齋奉璽書宣諭并勅四川鎮巡三司等官守促上道公疏辭謝云啓行兩月而詔旨即下到家三月而勅使又臨枕塊而承自天之恩越縈以拜如綸之命戀闕之情雖切陟謁之痛方深况人生大倫君父最重輔臣舉措風化所關喪親不能自盡不可以爲子禮義或少有愆不可以範俗若以庸劣之才藉故事爲口實當太平之世襲金革之變禮己自內媿人其謂何上批答曰朕以輔導元臣忠勤久著特令勅使守取速來卿宜體朕至意即日就道以慰人望再不必辭公又疏言君臣之義固無所逃而

父子之恩終不可解三年之愛人子之情三年之喪古人中制羸瘠之軀遽難馳于道路衰毀之狀亦有覲於班行徒戾禮經無補風化上鑒其真切乃批答云卿孝思純至固乞終制覽奏良用惻然今勉從所請差去內官先回待卿服闋還着鎮巡官催促馳驛前來供職以副委任公乃得終喪於家正德十年六月六日服闋朝廷先期遣行人劉翀至蜀以服闋之明日同鎮巡三司府縣官詣公家宣璽書公懼時事難爲堅不欲起詔使在門當道守候府縣住俸同促就道不獲已於八月三日發新都至東河驛復欲辭疾陝西當道請曰近聞聖駕出居庸關人情皇皇公不圖輯寧以報國乎舟進潞河京師動戚府部卿寺部署及臺輿校役皆相率出迎自崇文門接通州車騎雲擁上在邊聞公至甚喜遣內侍賜寶鉞羊酒正德十二年十月二十一日入閣先是上北狩公疏請回鑾不報十二月二十八日與蔣公至居庸請駕有旨止之時北狩將歸先遣人諭內閣府部各爲旗帳奉迎錢寧來逼公首倡公曰旂常在國銘功臣耳旗帳施親舊里俗也君尊如天敢有瀆獻乎威武

大將軍是何名號上復遣所幸通使張龍來云朝廷說楊閣老不肯作旗帳他忘了往年一遣內臣兩遣行人取來之恩典過他大臣十倍今乃執勘問他懼否公曰雷霆之下敢不震懼但不敢以非禮事君耳正月七日駕回候迎皆不用帳上素重公亦不謂忤也時兵部侍郎馮清奏捷上遣內侍張銳傳諭擬旨獎勵威武大將軍公曰皇上親征破虜禮宜稱賀從征將士亦宜行賞但不可奏捷今馮清本內開有總督軍務威武大將軍總兵官諸字樣是以臣率君也豈敢輕易擬旨公又曰本內所稱威武大將軍者何人豈馮清所當奏捷我輩所敢獎勵耶銳曰朝廷在教場立行票旨而後入公執不可銳去復來公曰必欲擬旨須馮清別具奏去前大將軍號止獎勵該鎮守臣乃可不然決不敢擬也銳去偕錢寧來泣而言曰朝廷疑銳言之不明又令寧來請卽擬票公曰此事關係至大今日不言誰執其咎寧回奏言楊廷和堅執不回上令回閣擬旨公與蔣公冕具疏執奏和前止擬獎勵馮清不及威武大將軍一字公復臥病乞休疏再上不允時上又欲南巡杖言者舒芬

姜龍等於朝公聞之亟出謂司禮近侍曰爲廷和轉言於上各官諫上南巡皆一念忠愛爲宗社計也今聞有死於杖下者何以傳示天下後世皇上承九廟之祀奉兩宮之養國本未建人心危疑見今軍民困苦盜賊縱橫聖駕欲南去遠涉大江應接皆腹裏人不比胡虜易辨倘有姦謀潛匿闌舟縱火倉卒何以應之又有宗室窺伺或僞爲奉迎誘至深宮進退不能消息不達噬臍無及矣時宸濠逆謀已成人無敢言者公語及此聞者竦然明日公與同寅三公伏闕留止三日不得命內侍張銳出左順門公以前語司禮者語之銳曰此無與銳事公當親奏豹房公曰我知有乾清宮不知有豹房也若等朝夕奏事豹房所奏果何事耶銳汗顏而退五月御史蕭淮上言宸濠謀爲不軌衆相視無敢言公曰寧府之謀天下皆知而不敢言御史獨言之難矣然反形尙未露先年宣廟征漢府回學士楊榮陳山奏趙府嘗與連謀請移兵討楊溥楊士奇以爲不可請命皇親大臣往諭之趙府卽謝罪獻還護衛不煩兵而解中使以聞上令公撰勅遣太監賴義侍郎顏頤壽駙馬崔元往

諭宸濠獻還護衛屯田毋令諸賊亡命出入府中改護衛爲南昌左衛并諭撫按三司知之時內外權倖多與宸濠交通口語籍籍少監盧明曰不日有六國索梟錯事公曰梟錯爲國家計瑾敗削衛不聞梟錯者今索錯豈有主之者耶崔元輩還延不進至浙江聞孫都御史燧許副使達遇害乃奔回至天津王尙書瓊使人要於路曰復命時當云寧府本不反因削護衛乃反三使者不以其言爲然南京以變聞瓊猶庇之復奏云寧府旣反九江彭澤何乃無印信文書公曰來奏云賊破九江彭澤印信被奪寧有印信文書耶瓊又復奏事有可疑中間未審端的又曰尤爲可疑中間恐有別情意在陽阻官軍陰助宸濠也公與廷辨盡發其姦而瓊甚怨公百計誣陷然公守正卒不能中也七月上欲親征羣小慫恿之意益決公屢疏諫止終不納十三日命司禮監集百官議於左順門公與同寅三公曰此但當命文武大臣督京營官軍計之耳此賊得罪天地祖宗且無政以懷其軍民者若出黃榜諭以順逆使之勤王誅首惡寬脅從卽旬日變從下生不煩天兵矣昔永樂中北征



有皇太子居守宣德中征漢府有鄭王襄王居守今聖駕出征居守重任付之何人乎明日親征旨下不能止也兵部請內閣護從又乞載御寶行公曰戰危事也倉卒草野中易起奸心往時四川賊郅老人掘廢印尚且惑衆况國器乎卽有除拜號令亦凱旋行之御寶無所用焉由是御寶不行而梁公儲蔣公冕護蹕又明日有中人傳旨欲寫調土兵及王府兵空勅公曰土兵反覆不必調王府無兵可調也竟不進稿八月十九日上將出會公薦劉尙書春知制誥有旨責公用鄉里令回話公出閣中遂有寫勅進者明日乘輿行矣正德十五年十一月上還自南征住通州召公至行在令擬旨先誅宸濠然後入宮公曰宗室有罪必先告廟令文武羣臣議罪以聞而後誅之此先朝故事也今於通州行之臣不敢奉命上曰先生亦爲此言耶朕嘗檢宸濠私簿朝中大臣多受賄者獨先生無之故以此委托若入京後恐我亦不得主張矣時上疾已篤且無主嗣又深疑左右倖臣公知不必再執遂擬旨於通州行在誅宸濠十六年三月魏彬張銳傳旨言郊祀大禮未舉朕心未安

又言太醫院用藥無功當以萬金購草野醫人冀萬一公知上意有在  
非求醫也亦出榜諭購乃謂彬等曰若有大變公輦禍福在反掌間彬  
曰何謂禍福公曰我輩與聞處之如倫叙天下以安內外同福反是公  
等先受禍及我輩矣彬曰聽老先生處分彬等豈敢十四日早少監陳  
嚴倉皇來報駕崩於豹房矣公卽語嚴曰急啓太后命移殯於大內且  
議所當立少頃谷大用張永張銳至閣中授公一紙乃大行皇帝遺命  
也辭曰銳與蘇進陳敬我這病則怕好不的昨每與張銳叫司禮監來  
看我有些好歹奏娘娘與閣下討較天下重事要緊不關你衆人事是  
我誤天下公讀罷舉哀畢曰羣臣止哭遂取皇明祖訓示諸司禮曰大  
行皇帝未有後當遵祖訓兄終弟及之文急啓皇太后降懿旨大行皇  
帝降懿旨遣司禮監文武大臣各一人奉迎迎賓長子來卽皇帝位王瓊  
率九卿突入左掖門厲聲曰九卿在廷我爲長今誰當立者而不使聞  
公左右目遂皆不對乃皆散去於是遣大學士梁儲司禮太監魏彬谷  
大用定國公徐光祚駙馬崔元禮部尙書毛公澄公持金牌信符授之

公意不欲遣魏谷倉卒防變故不之虞初聞變公先命閉閣門時權奸各欲立非次以貪功避罪相求如市買皆不得入王瓊聞閣門閉大沮議定奉所擬懿旨及大行皇帝書入啓畢就左順門宣諭朝臣衆皆躍然大呼曰天下事大定矣朝臣就閣中謁謝且賀曰昔呂端鎖王繼恩韓琦升八大王時權專任重也今無其權而事又獨難然定策頃刻間權奸拱手外朝不知加呂韓數等矣公曰祖宗功德無疆之福亦同官協力所致予何力之有焉遂擬旨散豹房官軍令太監張永張忠武定侯郭勛安邊伯許泰兵部尙書王憲提督優恤揀選團營官軍分布皇城四門及京城九門防守令威武團練營官軍各回原營各邊鎮革皇店官校并軍門辦事官旗校尉俱回本衛命哈密及土魯番諸處貢夷人當放回者該部照原擬賞之差人送回餘會同館館之關防出入佛朗機一差人回廣東聽候豹房番僧及少林寺取來和尚各歸本寺南京馬快船隻常例聽候外盡數發回各處帶來各色匠役樂工水手等各回原籍命東廠錦衣衛及五城巡視御史嚴夜禁捕盜賊皆出公獨

斷而以先帝未命行之或曰此等事何不少留待嗣君行公曰機會間不容髮時權姦人人自危若不急解之倉卒有變誰能制耶九門防守之命既下許泰意若不怡邀兵部王憲至閣欲有所言公問則徙倚不對而私相諄語公曰危疑之際所仗在提兵諸公報國正在今日欲言則直言何令我輩揣摩耶憲曰許總兵與江平虜同事西官廳今用許防守而遺平虜以此未安蓋爲彬地且以脅公也公曰團營根本故留平虜主調發泰不應以舌澤吻作怒色且微語曰這箇賊公問賊爲誰泰曰李琮又曰泰家止有三百人防護泰意又以琮脅公也公曰今日志臣義士無不奮力琮欲何爲自取滅族禍耶泰曰李琮兇狠平虜腹心也泰亦憂之公曰有諸公在琮不足憂亦無能爲也許公必欲與平虜同事可一言決之泰意不明與江彬異同欲持兩端以窺趨避耳頃之提督張洪至言彬可防公曰君何疑江反耶江征流賊回豹房過隊先帝見其耳帶箭鏃喜其驍勇因留置左右旣而護從巡狩一時內外文武皆有之不獨江也江何罪而欲反耶近年反者內有竇鏞宸濠外

有劉七藍五鄢老人皆隨起隨滅江內親外衆曾不比數賊假欲萌非望卽顧盼間藍粉矣誰肯同之自取滅亡哉若江能與諸公協力共濟嗣君至日閉門辭爵不失富貴何必自疑人亦政不須疑之耳諸公及本兵安所出策我書生握數寸管無能爲也洪唯唯而退洪蓋爲彬遊說以探公意而公對之語有操縱江閩之稍安是夕京城市間人馬介然有聲人心皇皇以爲彬且反矣又聞彬在家不成服齋宿不哭臨公深憂之以一刺投彬曰謝江公大事多賴鎮定彬喜以爲楊公不我虞也乃成服齋宿十七日朝臨罷公告蔣公故蔣公曰連日介介於懷者正以此耳公曰彬手握重兵發之須得機會先是李琮勸彬反不勝則北走虜彬猶豫未決而與公合謀者獨蔣公冕毛公紀司禮溫祥凡四人而魏彬亦不敢泄也張永伺知其意亦密爲備是日坤寧宮安獸吻彬吉服行禮而壽寧侯張鶴齡被檄之安陸公偕蔣公入用璽則大閤俱在公命屏左右謂魏彬曰大功已定大患未除未爲全美魏問其故公以魏與江連姻不可徑言先慰之曰古人大義滅親周公誅管蔡王

導滅王敦至今流芳青史公雖與江爲親乃勉奉大行命非本意也今  
外議紛紛若不早請太后擒之恐彼不自安將貽嗣君以憂未免爲大  
功之累也張銳疾言曰彬有何罪公曰如擅入邊軍禁內擅立威武團  
練營擅改團營爲西官廳擅立鎮國府所犯不一死有餘戮在魏曰實  
然無所逃死銳猶極力爲辯公曰不須回護我輩言出禍隨已委致身  
公家雖無子孫獨不念祖宗墳墓與兄弟耶嗣君途中萬一聞變而驚  
張公請保其責也公辭色俱厲陳嚴贊之曰且收得在嗣君或寬宥之  
今亦擬旨監候耳蔣公曰了此然後哭臨銳曰何故太急公曰此事間  
不容髮顧可緩耶卽擬旨奏太后與蔣公候於闕中久未下公曰權璫  
對我輩言尙百計攔截在宮闈豈肯贊成乎若不捷禍必先我二家我  
輩豈可離此地誠死此亦得死所矣蔣公曰天祚我明必無此事頃有  
報宣候右順門者久之陳嚴來曰江彬已擒矣幾逸出彬行禮畢張永  
潛使人報之遂奔西安門以西官廳文書爲辭中道折向北安門當關  
旨曰有旨留提督彬叱之曰皇帝何在安所得旨乎手批門者守門人

羣擁之追者至縛之時久旱遂雨城中謹聲雷動爲之謠曰拿了江彬  
朝廷安穩蓋以吻爲穩也頃之李琮亦自其家縛至罵彬曰汝早聽我  
言豈至於此彬曰悔不自斷其子怒其母亦然收捕者云彬已分布腹  
心於東西北安三門裏甲裏糧立馬以伺動息非公先以計安之後出  
其不意而擒之京師百萬流血成敗猶未可知也是舉也公之成算而  
贊其決者蔣公也彬之未擒也或有密請於公者曰一力士之力耳公  
笑曰客談何易安得此大力士耶其慎密如此嗣君將發安陸左右猶  
以此爲疑聞彬已擒乃欣然啓行四月二十一日漏下二鼓嗣君之行  
殿召公及府部大臣宣諭三上箋乃九五鼓由正陽門入議以明日天  
明卽位自三月十四日至是三十有八日也公承虛展總己內外晏然  
十六載弊政姦人皆擬於卽位詔除之日夜殫盡心力草置函中公侍  
行殿蔣公冕先歸閣中整理文書詔條內若軍門皇店官校豹房番僧  
烏亦虎仙數事公別書密緘之不敢露草蔣公至公家諭家童取去人  
莫知何文書也黎明時進稿請嗣君批紅出方鳴鼓是日向辰文書官

來言欲去關切中人者數條公曰數年以來事有齟齬不曰西邊不可則直稱朝廷不從今嗣君至便有此乃知前日負大行多矣卽此廷和便當去今日拜賀新天子明日卽跪奉天門前乞休且問皇上初至何人於左右欲更詔書雖死亦甘心也蔣公及毛公紀皆力言之文書房官知不可乃持回久之鳴鼓批紅猶未下公與三公亟趨華蓋殿後往來玉除間不見一人乃復趨奉天殿下見直殿者要文書官來相見語之曰亟去萬一悞事我輩且有說或言批紅不下明日開讀亦可公曰自古人君卽位雖草昧中亦須下詔改元以新天下之耳目今日若無詔書不知所改何年號人心惶惑恐有他虞誰任其咎文書官懼乃入奏批紅出改明年爲嘉靖元年詔下宿弊盡革讀罷滿朝士夫京城老少皆踴躍歡慶曰眞天子也成化以來朝廷所病者冗官冗食之費臣下建議未能裁省劉忠宣公大夏受知孝皇及上賓太監寧瑾奏止之東山以此怨侮叢集身幾不免正德中冒濫尤甚正德十六年四月以前在京官軍旗校勇士軍匠人等食糧之數共三十七萬二千七百餘



員名一歲支米三百九十八萬八千八百餘石歲運四百萬石之數除海運三十五萬石外雖盡數至京亦不能支公深憂之上卽位詔革人數十四萬八千七百七十有餘實支米二百四十五萬六千四百餘石所省一百五十三萬二千四百餘石國計雖紓而大怨亦叢集爲之謠曰終日想想出一張殺人榜皆裁革之徒騰之也公未辨色入朝有持刃恐喝於道上者上聞之令兵部撥官軍百人護公入朝名隨朝軍先是錢寧與江彬有隙彬發其黨宸濠事下獄上卽位兩月法司方議其罪寧平日厚遇士大夫中外皆爲所餌時有爲之彌縫者鞠之不得其狀公曰錢寧改易鎮守進退大臣受寧府賂遺假以護衛屯田罪同逆瑾豈得輕貸會籍沒江彬家得取宸濠世子司香手勅諸司禮令文書官持至閣中謂是錢寧所爲公曰寧罪惡至此我輩在外豈得盡知於是擬旨正其罪焉張銳張忠于經許泰等十數人下獄久未決銳等行賂中外動以百萬法司曲庇之又賂內庭得旨充軍而已公發憤上疏曰科道官劾奏張銳等罪陛下震怒下之法司聞者交慶謂是大有爲

之君也既而法司議上命會官詳審臣等擬票請呈亦從上改竟至寬貸聞者喪氣解體以爲不誅此則國法不正公道不明九廟之靈不安萬民之心不服禍亂之機未息太平之治未臻自古帝王制刑三千餘條曰元惡大憝不待教而誅大明律首以十惡不待時而決如銳等所犯是也此輩縱不皆誅而張銳張雄張忠三人與錢寧江彬同惡決不可赦今執奏者未已陛下仍以有旨答之令紛紛之議上及宮闈下逮左右可乎願賜獨斷追回此三人監候處決上乃令籍沒其財進公封伯爵給與誥券子孫世世承襲食祿一千石公上疏辭三疏四疏上批答數百言益切五疏公辭且言不得請必求去上批答云朕以報功宜厚已着定擬爵名卿乃屢疏懇辭決以去就特允辭封以全卿廉讓之節寫勅褒諭賜宴禮部仍廕一子爲錦衣衛指揮永遠世襲公又辭上批答曰朕念國統未定事勢危疑之際卿三人能同心協謀蚤定大計其時江彬稔惡負罪尙握重兵心懷不軌禍機難測卿又能卽擒獲不動聲色潛消大變朕雍容入朝中外宴然考之前史漢文帝宣帝繼統

之後亦嘗加封丞相楊敬蔡義等邑戶我太宗以尙書茹常有默相事  
機之功亦進封忠勤伯况大明律內明載出將入相能除大患盡忠報  
國者同開國功勳一體封拜朕前日加封爵義不爲過重違卿雅志已  
聽辭免賜宴進階錄廢略示報功之意宜勉承之不必過爲高潔以傷  
朕懷公方欲疏辭是時因公攀援爲錦衣者數十人兵部上議處公奏  
云定策之名在臣下固不敢言定難之功在諸臣亦宜有別武皇彌留  
之時國祚安危之際往日欺君悞國竊弄威權惡極罪大者人思脫禍  
之門朋奸附黨各持兩端者坐幸非常之變逆謀已形事機頃刻蓋廟  
堂之上機事不密姦雄之徒得逞所欲國家生民之禍固不忍言而二  
三密勿大臣之家不首罹蓋粉之殃而無噍類乎此等潛消禍變再安  
宗社之功尙不敢受封廢之報况代來驟遷禁掖舊任者乎宜加楊廷  
和以別樣恩典以爲大臣忠勤之勸得旨楊廷和旣准辭伯爵朕心缺  
然除廢子錦衣衛外再廢一子四品文職世世承襲楊廷和本職上進  
二階時臺省交章論王瓊罪狀下詔獄瓊迫則疏詰廷和以自解法司

乃當瓊奸律論死瓊力自辯得減論戍邊先是大禮議起公首執議召對面言不可者三封還御批者四執奏三十餘次司禮太監奉命來閣中講論者三十餘次公執不可謂上當後孝宗稱孝宗曰皇考獻王爲王叔考爵曰興國太王母妃曰興國太妃別立益王之次與崇仁王爲興王奉獻王祀禮部因之以請上弗悅用是左右得以間間之是後所言多不合先是瑾賣官鬻獄天下府庫財半入其門旣欲盡去官府簿書以滅其跡一日來閣中問曰諸司文卷無架閣處部中議欲焚之公曰圖籍國家所重可遂棄乎貯之通積庫或千步廊可瑾慙然明日乃移之千步廊焉涿州人王豸臂有瘤形類蜥蜴張永羣校緝得之曰此龍形也將惑衆校尉輩皆陞錦衣官而永自欲封伯旨徑下公曰自古內臣封爵如五侯童貫非美事亦不克終若本朝則絕無也誰敢爲此赤族事耶永曰劉馬兒太監封侯何謂無也衆無言公曰劉馬兒族人有功受封非其身也其墓誌在岳蒙泉文集卽命中書取類博稿來手揭示之永乃止自成化以來烏亦虎仙構土魯番據哈密奪金印爲邊

害數十年彭公澤嘗遣使諭土魯番乃私許以厚賞彭欲罪之虎仙乃賂王瓊塊玉重百三十斤祈免罪瓊遂誣奏彭公而虎仙得脫自是得近侍武宗豹房父子俱授錦衣指揮使公慮虎仙外知邊方虛實內覘朝廷事情脫罪而歸必將據哈密自立大爲邊患不止如宋元昊時事乃擬就改元詔中擒之不假兵革而邊患潛消矣正德末年鑾輿四出公居守在內而天下晏然至受武宗遺命定策之功尤偉議者謂周室重熙成康易代猶陳虎賁以備應門執干戈而衛翼室書之顧命以示後世韓琦之立英宗皇子已在宮繼立自有成序史臣尙謂呼吸之際有雷有風未有如今日虛大位以四旬迎嗣君於千里抽戈思逞者近在蕭牆擁兵助逆者匝環禁掖以今較昔豈止呼吸風雷而已而公從容處之略無動動散積卒於枕上擒首惡於掌中則公功又倍韓琦矣裁革冗食官軍雜校甚怨之闢其私構於左右不得相與咀呪於神或卜公祿命曰楊公何日死我輩必復矣時上頗留意齋醮道士陳應楮李雲容各資綠綵進用蠱惑公力言其不可引梁武宋徽爲喻優旨報納

江左比歲不登中貴人以御衣請遣官之蘇杭二府督織造工部及給事御史言之皆不聽趣內閣撰勅公等不奉命因極言民困財竭請毋遣官上仍趣撰勅且戒以不得瀆擾執勅公因力辯其非瀆擾執勅且謂臣等與舉朝大臣言官言之不聽而獨二三邪佞之言是聽陛下獨能與二三邪佞共治祖宗天下哉且陛下以織造爲累朝舊例不知洪武以來何嘗有之其創自成化弘治始耳憲孝二聖恤民節財美政非一陛下不之法而獨法其不美者何也卽位一詔中官之倖路絀塞殆盡天下方傳誦聖德而今忽有此何以取信因請究擬旨者上爲謝第戒所遣官毋縱肆而已不能止也公故已累疏乞休其後益力而又以持稱考獻帝議不合疏辭露不平上責以因辭歸咎非大臣道然猶賜之璽書續與廩郵獲如例申前賸子錦衣衛指揮使之命嘉靖二年致仕卒年七十

劉文肅公忠正德五年以南京禮部尙書入內閣拒貴近饋遺一日有盒擔數具伺門公不覺怒叱扛僕懼而趨卽仆盤具品物委於街巷或

謂太過苞苴盛行時不可無此事也公閱廷試卷子東閣一達宦非讀卷者入公怒置侍胥不輟其人出方已或亦謂太過請囑公行時亦不可無此事也公歸鄉不見客或勸之答曰諛詞巧說不曾習學卑禮詔態不曾操演知者謂爲龕鄙不知者且以爲簡放公之狷介如此正德六年以少傅武英殿大學士致仕卒年七十八

梁文康公儲以正德五年入內閣時秦王請陝之邊境益其封壤內交嬖臣江彬朱寧宦者張銳皆有賂爲之請祈武皇帝詔與之兵曹臣奏曰太祖皇帝有令禁茲土不畀藩封武皇帝曰與之兵科臣執奏曰茲土遂畀秦藩悖太祖皇帝制武皇帝曰業已與之六科十三道諫臣各執奏曰秦王請益封壤不可聽許武皇帝曰朕念親親與之勿拒大學士楊公當草制念曰若遂草制畀地秦藩恐貽後虞執不草制則忤上怒辱不可測遂引疾不視事大學士蔣公亦繼引疾公曰如皆引疾孰與事君武皇帝震怒內臣督促草制公承命草上制曰昔太祖皇帝著令曰此土不畀藩封非吝也念此土廣且饒藩封得之多畜土馬饒富

而驕奸人誘爲不軌不利宗社今王請祈懇篤朕念親親其畀地於王  
王得地宜益謹毋收聚奸人毋多蓄士馬毋聽狂人勸爲不軌震及邊  
方危我社稷是時雖念保全親親不可得已王愼之毋忽武皇帝覽制  
駭曰若是其可虞其勿與回天之力決於數詞然公未嘗自以爲功也  
正德己卯武皇帝躬巡邊羣臣諫曰萬乘不宜輕出乃自稱威武大將  
軍巡邊云詔宰臣草威武大將軍勅楊公廷和蔣公冕亦相次引疾不  
草勅武皇帝御左順門召大學士梁儲面促草勅公奏曰勅不敢草帝  
曰何逆命對曰凡事可將順獨勅不可草帝曰何不可對曰陛下爲君  
乃自卑而臣臣草勅是臣名君故不可帝震怒手劍立曰不草勅齒此  
劍諸免冠解衣帶伏地涕泣曰臣有罪今日就死他日陛下猶憫臣若  
遂草勅他日陛下覺而怒曰臣儲無禮以臣名君顯戮臣臣罪死不可  
赦帝察其誠教擲劍起不促草勅帝視師南都議幸蘇浙荆豫又議南  
都郊公與蔣公冕奏曰南都郊仁宗皇帝配天北都郊太祖皇帝太宗  
皇帝配天若遂郊南都配位不知所裁定帝乃不郊又將南幸公與蔣



公手奏行在門外請毋南幸自卯至酉汗浹背帝遣內臣諭起對曰臣未奉俞旨不敢起帝乃俞曰不南幸公與蔣公乃起君子曰江南不擾二公之力也近倖江彬用事欲請立所厚江西遠藩爲儲二府部大臣會議於內閣公正色曰皇上春秋鼎盛建儲未宜輕言萬一有他我輩什片鑽矣衆皆竦然其議遂寢公自入仕至歸老負郭不增寸土廣郡沈同知尙經曰順德南海番禺梁厚翁田無百畝所有者香山浮坦從化賊巢不食之土耳平日於人之饋未嘗却隨計其值而酬之公嘗欲建一祠令匠人擬其工費不過十餘金匠人凡三至公無以給也曰盍少需尋不能營給祠竟不克建公在位日王御史濤請典刑公田給事中賦請沒公之貲代天下輸租之半劉瑾矯詔抄公之家公在南京聞報皆不動也肅皇帝御極言官聯疏劾公假宸濤護衛兵故縱反者請置詔獄正其罪公不辯惟曰余只致仕去便已勿論宸濤護衛兵事由也劾者猶不已久之知與宸濤衛兵非公也實石齋楊公當制正德九年三月十五日也舊例凡閣下當制擬旨人親署銜著筆跡故不得誣移

之他人公惟引罪連三疏乞致仕無片言自辯公去位後大臣被劾無  
不辯者然後知公之大先是楊公廷和嘗守制不出公力薦起既至遜  
楊公居已上士論多之世宗皇帝入繼大統公與尙書毛澄等往迓于  
興邸楊公廷和忌公陰使其黨論之既而屢疏乞骸情甚懇切上留之  
至再乃可其奏護送乘傳還鄉降勅褒之有曰張九齡之忠蓋而不究  
其用崔與之之風概而不久於朝以卿視之可謂兼美嘉靖元年以少  
保華殿大學士致仕卒年七十七